

摘藻堂四庫全書薈要

史部

欽定四庫全書薈要卷七千八百二

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十二

省方

康熙八年己酉十月甲子

上諭戶部朕巡歷所至凡御用器物皆係所司由京城供
辦毫不取於地方除內殿之馬不用飼秣即部撥馬匹
所需芻豆亦屬無多向聞地方官指稱御用私派民間

預為儲備既不銷算又不還民貪汙官吏侵肥入己苦累小民重違法紀嗣後務加嚴禁倘有仍前借端科派者所司官嚴察叅奏重懲如匿不上聞事發一并治罪
康熙二十三年甲子九月乙亥

上東巡諭戶部工部光祿寺朕凡巡幸一切需用之物皆從節儉今巡幸之處需用草豆木炭食物概勿令地方官派取民間擾害百姓爾等衙門各委員前往按每程所用照時價採買供給倘有擾民者著該督撫指名題

參

癸未

上諭戶部朕軫念蒼生勤求治理邇年以來於畿輔郡縣
時行歷覽補助兼施今俯允廷議諏吉東巡正欲體察
民情周知吏治一應沿途供用皆令在京所司儲備毫
不取之民間猶恐地方官役不能悉體朕懷借端支應
妄行濫取今特加申飭如有悖旨私徵一經發覺定行
從重治罪更念此番巡歷原以撫恤編氓問俗觀風於

閭閻休戚務期洞曉凡經過地方百姓須各安生業照常寧處毋得遷移遠避反滋擾累爾部即行令該地方官於府州縣城市村莊窮鄉僻壤大張告示遍行曉諭務令通知以副朕惠愛元元至意

丁亥

上以東巡特頒恩赦

詔諭天下曰帝王誕膺景命統御萬邦道重觀民政先求莫是以虞廷肆覲肇舉省方周室懷柔式歌時邁詩書

具在典制丕昭朕仰荷

天庥續承

祖烈撫茲兆庶期底時雍夙夜孜孜懋求治理以富以教
靡敢怠遑猶慮郛屋艱難罔由上達故於直隸郡縣周
覽巡行勤施補助更念山左等處土宜俗尚不加循省
曷克周知矧厯逢甲子世際昇平聿圖泰運之恒新在
措芸生於豫大乘時命駕咨彼民依但樂利祇慰夫一
方而德澤未敷於九有朕心歎焉用是特昭公普以弘

仁庶奏誠和之盛治時臻熙皞彌隆寬恤之恩戶樂清
寧丕篤綿長之慶布告天下咸使聞知

康熙二十四年乙丑二月庚戌

上諭大學士等曰朕夙興夜寐勤求治理無非欲使小民
遂其生計故每次巡幸必帶科道官或有不肖之人強
行買賣擾害百姓者令其稽察此番因在近畿未經帶
來著爾衙門學士不時嚴行稽察叅奏

三月丙寅

上諭大學士等曰朕巡省南服見經過地方城垣圯壞者所在多有夫城垣者生民之保障所以衛吾人者也亟宜修築之其令地方官作何葺治著工部詳議以聞

康熙二十八年己巳正月庚午

上諭吏部等衙門朕統涖寰宇二十八年於茲早作夜思勤求治理務恤黎庶永圖乂安如黃運兩河運道民生攸係朕日切心勞比年工役雖漸就緒而應修應塞議論紛紜曩歲巡幸曾允淮揚士民所請疏濬下河前已

興工尚稽底績屢經廷議請朕親行閱視今特諏吉南
巡躬歷河道兼欲觀覽民情周知吏治所至沿途供億
皆令在京所司儲侍一切不取之民間即有日用應需
該衙門於所在地方照市估平買不許錙銖抑勒小民
猶恐地方官吏不能悉體朕懷借名科派供應今特頒
諭嚴敕如有悖旨借端私徵者察實即以軍法從事地
方文武大小官員不許與扈從官員指稱交戚輒通饋
遺違者饋送收受人員並以軍法從事其扈從大小官

員及隨往僕役如有橫行生事擾民者一并從重治罪
朕茲巡省原以軫恤編氓咨諏風俗凡經過地方百姓
各安生業務令廛無廢市隴不輟耕毋得倉皇驚避輒
滋煩擾其軍民人等懷奸挾詐希逞私憤擅於駐蹕處
所瀆行告訐者一概嚴禁倘有妄控除所告事不與准
理外仍嚴加治罪爾部即傳諭扈從大小官員人等並
各該督撫於府州縣城市村莊窮鄉僻壤徧懸告示備
行曉諭務令通知以副朕惠愛元元至意

壬午

上諭山東巡撫錢珏曰朕軫恤民隱載舉時巡懋宣德化
勤求疾苦比至山東所經城邑百姓扶老攜幼夾道歡
迎朕問知連歲順成民生稍得安業第思百姓足則國
家充裕若期比屋豐盈必以蠲租減賦除其雜派為先
邇年以來各省地丁錢糧已經節次豁免山東地丁正
賦意欲來歲蠲免今因巡幸至此特先諭該撫速行曉
示日傳三百里遐村僻壤咸使聞知以副朕省耕問俗

之意

癸巳

御舟泊山陽縣京河

諭江南江西總督傅拉塔江蘇巡撫洪之傑安徽巡撫江
有良曰朕南巡以來軫念民依勤求治理頃至江南境
上所經宿遷諸處民生風景較前次南巡稍加富庶朕
念江南財賦甲於他省素切留心因尚有歷年帶徵錢
糧恐為民累出京時曾詢戶部知全省積欠約有二百

二十餘萬今親觀歷茲土訪知民隱無異所聞除江南
正項錢糧已與直隸各省節次蠲免外再將江南全省
積年民欠一應地丁錢糧屯糧蘆課米麥豆雜稅概與
蠲除自此民免催徵官無叅罰爾督撫務須切實奉行
俾均沾實惠副朕愛恤民生至意如有以完作欠侵收
肥己等弊一經發覺定行從重治罪夫民為邦本足民
即以足國朕平日躬行節儉一絲一粟未嘗輕費所以
如此簡約者無非愛養物力為優恤元元之地在民間

惟正之供軍國所需豈易驟言蠲免邇年國用稍裕故
能頻沛恩施總期藏富於民使家給人足則禮讓益敦
庶漸臻雍穆之治著速行傳諭咸知朕意

丙申

上諭江南江西總督傅拉塔福建浙江總督王鵬江蘇巡
撫洪之傑浙江巡撫金鉉曰朕因省察黎庶疾苦兼聞
河工巡幸江南便道至浙江觀風問俗簡約儀衛鹵簿
不設扈從者僅三百餘人頃經淮揚民間結綵歡迎盈

衢溢巷雖出自恭敬愛戴之誠恐至糜費物力甚為惜
之朕視宇內編氓皆吾赤子惟使比戶豐饒即不張結
綵慢朕心亦所嘉悅前途經歷諸郡邑宜體朕意悉為
停止又見百姓老幼男婦奔走雜遝瞻望恐後未免誼
譁擁塞念此行原以為民不嚴警蹕但人衆多高岸水
次或有傾跌之虞一夫不獲其所足軫朕懷此後止於
夾道跪迎毋得紊亂追趨致有諸患著即詳加曉諭使
知朕愛民切實之意咸為遵行

二月己酉

上諭扈從部院諸大臣曰朕稽古省方咨求治理閱視河道期底平成凡有利於民生必令羣沾實惠茲行次浙省禹陵在望念大禹功德隆盛萬世永賴應行親詣以展企慕之忱其致祭典禮所司即察例舉行政治所先在崇文教江南浙江為人文萃集之地入學額數應酌量加增永昭弘獎江寧鎮江杭州駐防滿洲漢軍兵丁鎮守要地久歷歲時深用軫念應加恩賚以彰優恤又

諭曰朕南巡以來所經過地方官員除八法處分及列款

糾劾外凡因公註誤降級留任者俱准開復降級調用
者帶所降之級留任其經過地方見在監禁人犯除十
惡及詔款所不赦等罪并官員犯贓者不宥外其餘自
康熙二十八年二月十一日以前死罪及軍流徒罪以
下已結未結俱准寬釋以示朕赦罪宥過之意備辦船
隻地方各官効力勤勞著該督撫會同奉差官員確查
具題各加一級繹夫供役勞苦亦著該督撫查明人數

量給恩賞朕厪念民依特蠲租賦總期潤澤蒼生近見民間有建立碑亭稱頌德意者雖出羣黎愛戴之誠但恐各郡皆然未免致損民力誠使閭閻殷阜則裨益良多碑亭何與焉嗣後亦宜停止江浙錢糧既經蠲豁猶慮有不肖有司借端詞訟朘削民生著該督撫嚴行禁飭至各處樵關原有則例朕舟行所至諮訪過關商民每不難於輸納額稅而以稽留關次不能速過為苦樵關官員理宜遵奉屢頒諭旨恤商惠民豈可反貽之累

自今應力除積弊凡商民抵關交納正稅即與放行毋得稽留苛勒以致苦累違者定行從重處分朕早夜孳孳惟冀官吏軍民士農商賈無一人不獲其所故於民生吏治圖維區畫務極周詳爾等可即傳諭俾一體奉行稱朕意焉

癸亥

上駐蹕江寧府城

諭刑部尚書圖納等曰朕巡行所過見兵民相安地方寧

靖村居稠密然猶恐比屋不登小民有不得其所者且
兵民雖享太平之福尚慮無知或抵觸法禁用是大沛
恩澤蠲免錢糧赦宥罪犯以至官兵商民咸加恩恤至
於舟楫不通之所令營馬預備以應一時之需并綠旗
兵丁護從隨行此皆伊等分內專責但兵丁備馬勞苦
馬亦稍疲宜示軫恤一體加恩爾等將綠旗兵丁備馬
來者察明人數奏聞酌量給賞朕以綠旗兵止官馬一
匹恐隨行備用日久疲乏已令各回汛地駐防滿洲兵

所有馬匹業已足用揚州所備者亦著停止爾等即傳諭通知

康熙三十六年丁丑二月戊戌

上駐蹕大同

諭大學士伊桑阿曰自古人君巡狩凡所過地方前代帝王陵寢先賢墳墓及名山大川無不致祭朕此行沿途所經古帝王陵寢先賢墳墓及名山大川著查明具奏應祭者遣官致祭

三月戊寅

上駐蹕寧夏

諭四川陝西總督吳赫曰朕巡幸沿邊地方詢察閭井生聚及土田沃瘠之狀自晉及秦經行二千餘里直抵寧夏所以勤求民隱至殷且切朔方資大河之灌溉疏渠溉田宜於稼穡當茲春氣暢遂正三農盡力南畝之時誠恐有司官員不體朕懷因車駕經臨調遣師旅借辭供億擾累小民東作有妨西成奚望今一切軍需芻糗

俱儲侍足用至扈從簡約馬悉放牧並不以供辦草豆
動煩民力爾可傳飭有司勿借端科派違者治罪務使
地方百姓各安本業廛無廢市隴不輟耕以副朕親歷
邊圉軫恤民依之至意

康熙三十八年己卯正月辛卯

上諭吏部等衙門朕撫馭寰區又安中外孜孜圖治宵旰
勤民期於天下咸遂生成物無不得其所今邊烽永靖
四方無事獨是黃淮為患衝決時聞下河地方田廬漂

沒朕軫念民艱曩曾屢遣大臣督修不惜數百萬帑金
務期早綏黎庶乃歷年已久迄無成功今水勢仍復橫
溢浸漫城閭沈沒隴畝以致民多失業董其役者未有
上策可以宜民時厯朕懷未嘗少釋在內諸臣咸請親
臨指示為一勞永逸之圖方今春時雨水減少正宜講
求疏濬以遂安瀾爰諏吉南巡親加勘閱更以吳地襟
帶江湖乃東南重地勵俗省耕兼行臨視凡一切往返
供億皆備辦於京師即途次日用所需亦令各衙門照

本地時值採買總於民間一無所累仍恐沿途官吏藉名科派致累閭閻故特頒諭嚴行申飭如有悖旨假托派索者察實即以軍法從事該地方大小文武官員不許與扈從官員藉稱親舊擅相餽遺違者與受人員並以軍法從事其扈從大小官員隨行僕從人等如有橫行生事者一并從重治罪凡經過地方百姓各安生業皆如常時務令屢無廢市隴不輟耕毋得惶遽引避其軍民人等懷挾私怨受人指使擅於駐蹕處所輒行告

訐者一概嚴禁不准仍照衝突儀仗例嚴加治罪爾部
即傳諭扈從大小官員人等并行各該督撫於各府州
縣城市鄉村徧張告示務令億兆通知以副朕體恤惠
愛至意

二月丁未

上駐蹕楊柳青地方

諭領侍衛內大臣等曰朕念切民依往閱河工凡隨駕官
兵執事人員量供使用減少攜帶酌其人數分給官船

仍恐沿途或有紛擾爾等再詳議裁減以副朕愛民至意

三月壬午

上諭吏部朕以勤求民隱閱視河工特行巡省一切供御之費皆自內廷儲侍不煩有司而經過山東江南地方各官備辦夫船等項効力殊屬勤勞此等官員有因公註誤罰俸住俸降俸降級革職留任者著察明悉從寬免

戊子

上駐蹕蘇州府

諭吏部等衙門朕以黃淮衝決為患兼欲周知東南民生
風俗特行巡省比親歷隄堰詳加相度以疏導修築之
法指授河臣刻期興作隨南涉江表徧察民依頃至蘇
州府駐蹕有浙江文武官吏及在籍官員迎謁於行在
言浙民望幸之心至殷且切合詞諄懇不啻再三朕勉
徇輿情揚旌前發以三月十九日啟行自出京師以來

一切供御之需皆出儲備其沿途日用令該衙門照各
地方時價採辦一無所累於民如有官吏借名科派致
擾閭閻者察實以軍法從事地方大小文武官員與扈
從官員私相饋遺及扈從大小官員隨從人等有橫行
生事者並以軍法從事凡經過地方百姓各安生業皆
如常時務令廛無廢市隴不輟耕毋得違遽引避方今
正屆農時所過田畝勿令踐踏其軍民人等懷挾私怨
受人指使擅於駐蹕處所輒行告訐者一概嚴禁不准

仍照衝突儀仗例嚴加治罪爾部即傳諭扈從大小官員人等并行該督撫於各府州縣城市鄉村徧張告示悉行曉諭務令億兆通知以副朕體恤惠愛至意

四月辛丑

上諭戶部禮部朕子育黎元勤求治理日孜孜以施德澤厚民生為急務而江浙二省尤東南要地朕時切軫念比歲以來蠲豁田賦賑濟凶荒有請必行無災不恤雖漕項錢糧向未蠲免者亦曾特旨蠲免愛養之道備極

周詳庶幾民生日益康阜用是乘輿時邁於視河事竣
巡歷江浙諮訪民間情形見淮揚一路既困潦災而他
所過州縣察其耕獲之盈虛市廛之贏絀視十年以前
實為不及此皆由地方有司奉行不善不能使實惠及
民所以小民雖懷愛戴之誠而朝廷恩澤卒未下究朕
目擊屢懷亟思拯恤截留漕糧寬免積欠另有諭旨惟
各鹽差關差向因軍需繁費於正額外令在差官員以
所私得贏餘交納充用今思各官孰肯自捐私橐必仍

行苛取商瘠民困職此之由著將加增銀兩一概停罷以紓商民之累其兩淮鹽課康熙十六年曾加增四十萬兩今恐商人辦課維艱有漸至匱乏者著減去二十萬兩此外有應行應革事宜朕還都以後仍加商確次第舉行該督撫藩臬皆地方大吏亦著悉心體訪凡有可為民興利除害者作速勘實陳奏嚴革雜派禁止刁訟俾胥吏不能作奸良民得以安業倘官吏有悖旨妄行者許商民首告該督撫察出即行叅奏朕視民如傷

惟恐一夫不獲其所茲值海宇昇平兵革不事正當與民休息之時故特渙沛德音減徵寬稅以為閭閻留餘之力至於江南浙江人文稱盛入學名數前已酌定增額今著於府學大學中學小學各增五名舉行一次以示獎勵人才至意爾部即遵諭行

五月丙戌

上諭大學士等曰朕茲南巡見地方官員誠心為民者甚寡一切務虛名而無實效甚無取焉朕觀河工亦非難

事任事者果皆竭誠効力加意奉公何難告厥成功耶
若刷河底極深徑趨入海諸水仍出清口歸海則高郵
等處不告水災而下河亦可無虞矣又見沿途鈔關已
極頽敝皆由關差監督未經簡選但較俸差往其中貧
窮卑猥者或將親戚家僕或傭僱人役挈之而往任此
輩恣意妄行自有害於商賈且盤詰關津亦有害於百
姓嗣後關差俱令本衙門堂官保舉始行差遣

康熙四十一年壬午九月甲子

上諭吏部等衙門朕念黃淮兩河為運道民生所係屢次

南巡親臨閱視以疏濬修築之法指授河臣閉六壩以東淮敵黃通海口以引黃歸海比歲以來工程次第告竣修防漸有成效昨年冬月河臣張鵬翮曾以河工善後之策及應修之處請朕親閱指示茲當農事之隙減約從員輕裝南下自徐州一路循視隄堰沿途皆設營幄不御屋廬日用所需悉已儲侍經過地方一切供帳宜通行禁止倘有官吏藉名科派累及小民或指稱預

辦擅動庫帑察出定嚴加治罪地方大小文武官員與
扈從官員託言親舊私相餽遺及隨從人等有妄行生
事者俱以軍法從事閭閻百姓各事本業不須引避有
懷挾私怨於駐蹕處所告訐者一概不准仍照律治罪
該部即傳諭扈從人員并行各該督撫於所屬府州縣
徧張告示務令通知以副朕體恤民生至意

康熙四十二年癸未二月丁酉

上駐蹕蘇州府

諭大學士等曰觀近日南方風景較之昔日似覺稍寒江

北之竹盡皆黃色即此可知蘇杭潮濕較前亦大減康熙三十八年南巡時潮濕即少差今更減矣民間生殖亦較前豐裕大約任地方督撫者安靜而不生事即於民生有益倘徒事才幹不體下情以此爭先出衆民必受其殃矣所以朕於扈從人等恐其生事時屢於懷諸事惟務謹慎不時嚴禁倘朕欲將州縣官員日加驅使未為不可所以不忍為者亦因體恤微員耳今總督巡

撫能如此體恤者甚少也

十月丁丑

上諭吏部等衙門朕統御寰區勤求治理鑒輿時邁省方
觀民春月閱視河工自畿輔山東以及江浙地方皆經
巡幸茲兩河漸已底績所至之地民生風俗亦因以周
知念陝西省為巖疆重地當出師塞外時曾經歷其邊
境而西安一路未及親莅頃陝西督撫諸臣言秦民望
幸之心至殷至切合詞陳奏河南山西巡撫等亦諄切

具請乘此冬令農隙之際觀覽民風詢察吏治簡閱禁旅整飭軍營實為要務用是輕裝簡從諏吉西巡沿途一切供御皆由內廷儲備纖毫不取辦於地方即遇有市易之物亦敕所司依時價給值不許錙銖抑勒所過大小官吏宜體朕愛民德意勿借詞供億私派閭閻如有悖旨科斂者察出即以軍法從事地方官不許與扈從人員指稱交戚私相餽遺違者並以軍法從事其扈從人員宜約束僕役勿使妄行如不遵法紀生事擾民

一并從重治罪朕視民如子凡乘輿所至市廛隴畝宜各安生理米豆薪芻等物民間照常貿易不必禁止惟懷私挾詐衝突告訐者所告事不准理仍嚴加治罪爾等即傳諭扈從官員人等并行各督撫令於經過府州縣城市村莊徧示曉諭俾咸悉朕懷

戊戌

上駐蹕太原府城內

諭山西巡撫噶禮曰朕君臨天下四十餘載無一刻不以

蒼生為念近因西省望幸甚切故於冬時農隙減從輕騎由晉以及秦入境以來觀風問俗見民生畧有起色閭閻之間俗樸尚儉朕心少慰朕自弱齡讀書往往以不知窮簷僻壤之疾苦為歎息所以畱心於官方凡有往來者必先諮詢民情豐歉偶有失時定加蠲賑且思晉省不通水運歲或不登即難籌畫雖有州縣存貯之米穀未必實數具在今歲山西收成頗佳爾等仰體朕愛民如子之至意曉諭民間若豐歲用奢則荒年必致

匱乏教之以禮義導之以守法重農務本藏富於民則
朕無西顧之憂矣凡朕所經之處必大沛恩澤因今歲
東省災甚已蠲四十三年地丁錢糧又免雲貴廣西四
川地丁錢糧所以不能施惠但將四十二年以前山西
所屬州縣未完銀兩米草盡行蠲免以示朕加惠黎元
之意

十二月丁丑

上駐蹕衛輝府城內

諭河南巡撫徐潮曰朕念西土兵民生計乘冬令農隙之時特事西巡返轡京師道由豫省自入潼關見閭鄉以及河南府民生甚艱而懷慶少裕至衛輝府則又艱苦賴薄有秋成尚能餬口倘遇歉歲必至流亡此皆大小官吏互相容隱雖有衰老病廢懶惰退諉之員仍使在任以致貽悞地方河南百姓質朴愚魯輸賦從未稽遲而今歲所欠甚多顯係州縣官聞朕蠲除秦晉積欠錢糧希冀恩免於中漁利見今民欠俱免催徵著將河南

通省俸工銀兩補足所欠之數如有不完停其陞轉俟
完日開復

庚寅

上西巡回京

諭大學士等曰前南巡多由舟行官民羣集兩岸迎駕頃
西巡皆由陸路凡臨幸郡邑官民無不扶老攜幼懽騰
道左每清問及之又令在乘輿左右備諮地方利弊彼
皆輸誠披瀝暢所欲言是以風俗民情靡不洞悉朕巡

幸七省畿輔秦晉民俗豐裕江浙則較三十八年時更勝山東近因水旱大異疇昔河南百姓生計甚艱此二省之民深厯朕懷又聞各省火耗俱是加一錢糧最少者惟有甘肅通計正額共二十八萬有奇加耗亦止二萬八千州縣官錢糧既少加耗無幾不敷用者宜或有之其餘賦額皆多如一州縣正額有二三萬加耗即至二三千宜敷用矣而州縣官仍有以艱難告者其故安在朕隨地諮訪督撫雖有不受餽遺者然餽藩臬者若

干餽道府者若干豈可盡云廉吏乎

康熙四十三年甲申十一月戊午

上諭大學士等曰凡車駕巡幸之處一切需用從不取辦於民而各省不肖官員指稱修理行宮供備器物並建造御書碑亭等項名色輒行動用正項錢糧借詞捐還究無償補及至虧空數多復加倍私派科歛肥己以致重貽小民之累種種弊端不可勝指嗣後凡建造碑亭等事宜嚴行禁止

康熙四十四年乙酉正月戊午

上諭吏部等衙門朕屢念民生加意河道屢行親閱一切
疏濬修築事宜悉經周詳指畫獲告成功前黃河之水
往往倒灌清口者皆由仲莊閘與清口相對駱馬湖水
勢湍急遂逼黃流灌入清口朕視河時躬臨相度命河
臣移仲莊閘改建於楊家莊之下工竣之後河臣報稱
黃水暢流入海絕無倒灌清口之患朕尚未經親閱今
欲特蒞其地察驗形勢用籌善後之規其中河黃河運

河有應加修防者亦隨宜指示以圖經久至於山東游
饑之民賴兩年極力賑贍繼以有秋幸皆得所其民間
生聚果否殷阜並於沿途親行周覽焉乘茲仲春解凍
減從輕裝循河南下往返皆用舟楫不御室廬經過地
方不得更指稱繕治行宮妄行科斂其日用所需俱自
內廷供御從無纖毫取辦於民前此屢次南巡閭閻皆
所深悉倘有不肖官吏借名預備擅動官帑並圖日後
加派補償以為巧取侵漁之地者事覺嚴行治罪決不

寬宥所在官吏私餽扈從人員及隨行人役生事擾民者俱如前旨以軍法從事奸民挾私控訐者從重治罪爾各部即通行傳飭仍令各該督撫張示徧諭俾小民咸知朕意

二月庚寅

上諭大學士等曰朕不意山東之民遽能如此前者南巡見閭閻失所不堪屬目今乃大異往時皆由承平日久國帑富饒故能蠲數年錢糧遣官贍養賑濟耳凡罹災

荒倘預行奏報無不可賑救者止因山東各官匿災不報故大致饑饉向日陝西饑荒亦由於匿不報聞朕曾以地方官匿災不報之故詢之於民據云民一罹災朝廷即蠲歲賦則火耗無徵故地方官隱而不報也自古弊端匿災為甚誠預為奏報即設法賑濟矣民豈遽至饑饉耶

三月壬子

上南巡駐蹕蘇州府城內蘇州府屬萬民以恭逢

萬壽節奏進諸品食物

上諭曰朕因閱視河工巡訪風俗而來非為誕辰也且朕來時一切應用之物俱備自內府所過地方秋毫無犯今爾兆民中心篤摯朕已知之即如朕受之矣爾等可攜去

康熙四十六年丁亥正月丁卯

上諭吏部等衙門朕念淮黃兩河工程為東南要務屢次躬臨河上相度指示一切修防疏濬業已次第奏功昨

歲河漕督撫諸臣詳勘地形請於溜淮套別開河道直達張福口以分淮勢此係創建之事合詞請朕親閱九卿等集議再三陳請以諸臣之言奏聞


皇太后祇遵

慈命擇於本年正月二十二日啟行閱河舟楫往返不御室廬日用所需取辦內府經過府州縣毋得更以預備行宮供設御用冒侵庫帑科斂閭閻倘有不遵事覺定嚴加治罪其文武官員私自餽贈隨從人役生事擾民

及奸惡挾私告訐者俱重處不宥爾部即轉行各該督撫通飭所屬張示徧諭俾咸知悉



大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十二



總校官庶吉士臣張能照

校對官檢討臣李學錦

謄錄監生臣朱恂

謄錄監生臣費恩綸

欽定四庫全書薈要

史部

聖祖仁皇帝聖訓卷三十三

臣紀昀詳校

詳校官編修臣繆晉

欽定四庫全書薈要卷七千八百三

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十三

治河一

康熙九年庚戌九月丙辰工部議覆河道總督羅
多疏言修河工程額用協夫請於江南山東兩省
僉派協濟查僉派夫役恐道遠民艱不便准行

上曰河工關係重大時近冬寒勢不容緩倘臨期應募無



人復行僉派必致遲悞著該督先行竭力召募儘所得人夫供役如萬不能得就近量行僉派協濟仍一面作速題明該管官員務須加意撫恤不得借端科擾困累小民

康熙十一年壬子九月辛丑

上諭工部河道屢年衝決地方被災民生困苦深軫朕懷據遣往視決口侍衛吳丹學士郭廷祚回京繪圖進呈朕觀黃河自宿遷以至清口皆為緊要雖有遙隄一層

恐未足捍蔽水勢應否於遙隄之外再築一隄爾部即行文總河總漕公同相視商酌築隄果否有益并所需錢糧逐一詳確議奏

康熙十五年丙辰十月辛未

上遣工部尚書冀如錫等閱視河工

諭之曰河工經費浩繁迄無成效沿河百姓皆受其困今命爾等前往須實心相視將河上利害情形體勘詳明各處隄岸應如何修築務為一勞永逸之計勿得苟且

塞責如勘視不審後復有事爾等亦難辭咎又近聞奉
差至外省者地方官吏所在迎送甚為勞擾此皆有累
民生之事爾等前往宜一概禁止

康熙二十一年壬戌五月丁卯

上命戶部尚書伊桑阿等勘閱河工

諭之曰黃河潰決關係運道民生深切朕懷歷觀書史所
載及從前條議章奏治河不在空言而在實行未可輕
言河工之易也若以為易則未可刻期奏功即收實效

若以為難由楊家莊至清口一百二十餘里係漕船往來必由之要路修築隄堰豈容稍忽爾等前去務與靳輔公同商酌加意看驗勿各執己見凡有會議事宜必逐一陳奏

庚午

上諭戶部尚書伊桑阿等曰淮安等處河道頻年衝潰靳輔作何修築工程堅否特遣爾等往勘若到彼處各宜秉公持正悉心詳畫庶稱任使如有通同徇私或行欺

罔者必加重處

是日

上諭侍郎宋文運曰伊桑阿前曾閱過河道一次今爾係初往如有確見務必堅持詳議毋以伊桑阿為尚書已為侍郎阿意順從治河最為難事候補布政使崔維雅所奏款項爾等帶往會同靳輔詳加確議務期堅久以濟河工除河患勿視為尋常玩忽貽悞也

康熙二十三年甲子十月辛亥

上巡閱黃河視北岸諸險工

諭河道總督靳輔曰朕向來留心河務每在宮中細覽河防諸書及爾屢年所進河圖與險工決口諸地名時加探討雖知險工修築之難未曾身歷河工其河勢之洶湧漶漫隄岸之遠近高下不能了然今詳勘地勢相度情形如蕭家渡九里岡崔家鎮徐家壩七里溝黃家嘴新莊一帶皆喫緊迎溜之處甚為危險所築長隄與逼水壩須時加防護大畧運道之患在黃河禦河全憑隄

岸若南北兩隄修築堅固可免決齧則河水不致四潰
水不四潰則濬滌淤墊沙去河深隄岸益可無虞今諸
處隄防雖經整理還宜培薄增卑隨時修築以防未然
不可忽也又如宿遷桃源清河上下舊設減水諸壩盖
欲分洩漲溢一使隄岸免於衝決可以束水歸漕一使
下流疏洩可無淮弱黃強清河噴沙之慮近來凡有決
工處所皆倣其意不過暫濟目前之急雖受其益亦有
少損倘遇河水泛溢乘勢橫流安保今日減水壩不為

他年之決口乎且水流浸灌多壞民田朕心不忍爾當
籌畫精詳措置得當使黃河之水順勢東下水行沙刷
永無壅決則減水諸壩皆可不用運道既免梗塞之患
民生亦無墊溺之憂庶幾一勞永逸河工可告成也

十一月辛未

上諭河道總督靳輔曰朕觀高家堰地勢高於寶應高郵
諸水數倍前人於此築石隄障水實為淮揚屏蔽且使
洪澤湖與淮水并力敵黃衝刷淤沙關係最重今高家

堰舊口及周橋翟壩修築雖久仍須歲歲防護不可輕視以隳前功

康熙二十四年乙丑正月戊子

上諭大學士等曰總河靳輔所奏黃河南岸毛城舖等處北岸大谷山等處宜建減水壩令水分流歸仁隄等處宜建石壩保護曾命九卿等會議朕南巡時靳輔亦稱自白洋河引黃水下流入洪澤湖駱馬湖以助淮水其下清河縣黃淮合流之處因有洄渦自能洗逐淤沙朕

思導流之水總會於清河縣水勢既強流湍激湧必致踰越隄岸愈損民間田廬此減水壩雖有益於河工實無補於百姓不可不為熟計爾等以朕意傳示九卿務籌久遠其詳明議奏

康熙二十五年丙寅七月丙戌

上諭工部侍郎孫在豐曰朕前因巡幸江南見高郵寶應等七州縣積水汪洋民罹昏墊朕甚憫之應行開濬下河疏通海口俾水有所歸民間始得耕種特發帑金拯

抃七邑災民屢集廷議兼詢輿情允協僉謀事當釐舉
茲命爾前往淮揚所屬下河一帶車路等河并串場河
白駒丁溪草堰場等口挑濬事務專屬於爾監修爾宜
親身相度多方經畫講求源流脈絡次第興工督率帶
去司官等務實心任事毋得怠忽擾害其司道府廳州
縣等官如有違玩貽悞及勢豪紳衿妄行干預包攬生
事阻撓工程者指名叅奏爾受茲專委須竭忠盡力悉
心區處速竣大工使海口疏通水消田墾蒸黎復業以

副朕救民之至意如因循怠忽虛費財力責有攸歸爾其慎之

又

諭司官鄭都等曰爾等雖經部院辦事但治河非所熟練今將爾等差往必當同心協力務期有成毋得各執己見侍郎孫在豐將應修地方派與爾等須各遵所派料理不得圖易辭難互相推諉

十二月丙寅監修下河侍郎孫在豐等疏言請

敕河臣遇水勢稍減即將滾水壩盡行閉塞以便開濬下

河

上諭大學士等曰頃郎中鄭都至京奏稱伊回時即興工挑濬下河朕諭云此事恐未能即便興工今孫在豐等果如此具題其不能與靳輔抗明矣今若不閉塞滾水壩等口則下河一面挑濬上河一面放水何日方有成功若即閉塞日後運河潰決則靳輔借以為辭欲籌兩全之道實為甚難然靳輔前曾啟奏築堤以束下河之

水使之歸海此疏內有無閉塞滾水壩等口之語爾等
即會同九卿詳看如向欲閉塞今孫在豐修理下河又
云不可閉塞可乎是日大學士等會同工部奏請令靳
輔孫在豐來京其滾水壩等處應否閉塞二人各
陳已見恭候

皇上裁定

上曰此下河決宜開濬斷不可止孫在豐不必令其來京
堵塞隄閘之處孫在豐何敢輕言若日後上河潰決渠

能任其咎乎孫在豐所請不過上河不放水耳假使靳輔治理下河不塞水口能於巨浸中從事乎令靳輔為之必欲閉塞諸口今孫在豐為之又云不可豈非有阻撓之意耶著靳輔來京朕面問之

康熙二十七年戊辰三月壬午

上諭九卿等曰朕於河務留心甚久崔維雅所呈治河書亦曾細閱其勢必不能行即彼所云自蕭家渡直開至清口日用夫七萬期於五旬告成朕思夫役安得如許

之多即夫役可得而飲食柴薪之類從何運濟此說於理難通朕未之信也屯田害民朕已洞悉各省民田未有不溢於納糧之額數若以餘田作屯按畝定額豈不大擾民乎屯田不行無可復議至下河作何開濬重隄應否停築爾等公同詳酌確議具奏

四月庚申

上命兵部尚書張玉書等勘閱河工

諭之曰前于成龍奏稱靳輔開中河無所裨益今凱音布

等往勘中河奏稱中河內商賈船行不絕若塞支河之口則駱馬湖之水匯流中河水勢既大漕艘可通數年以來河道未嘗衝決漕艘亦未至有悞若謂靳輔治河全無裨益微獨靳輔不服朕亦不愜於心矣且黃河自宿遷以下衝決猶可修治若宿遷而上或致泛濫則為害甚大今據凱音布等奏稱中河所行漕艘慕天顏勒令退回支河之口不許閉塞如此阻撓深屬可惡著即行嚴訊問誰為唆使則實情畢露今遣爾等往閱河工

務將毛城鋪高家堰等地方徧閱就靳輔所修築之處其甚善而斷不可改者有幾不善而應更改者有幾詳悉商酌定議以聞至靳輔言黃河沙底漸高此斷不可信譬之盆內貯水遇風尚且溢出使黃河沙底果高一有風濤其有不漫溢橫流決隄潰岸者乎

五月癸酉

上諭兵部尚書張玉書等曰往閱河工凡是非可否當秉公陳奏不可推諉朕聽政二十餘年閱歷世務已多甚

慄慄危懼每遇事必慎重圖維詳細商確而後定歷年所奏河道變遷圖形朕俱留內時時看閱朕素知河道最難料理從古治河之法朕自十四歲即翻復詳考如宿遷以下高家堰等處運河朕所深知爾等皆國家大臣此係公務非一己之事若果有異災大水隄岸衝決亦非爾等所能保爾等但據現在從公詳閱將情形大畧先行陳奏看畢之後再行具疏奏聞

康熙二十八年己巳正月辛卯

上閱視中河至支河口下馬坐隄上出河圖指示扈從諸臣及江南江西總督傅拉塔河道總督王新命漕運總督馬世濟等

諭之曰河道關係漕運民生若不深究地形水性隨時權變惟執紙上陳言或徇一時成說則河工必致潰壞且就目前觀之修治此處似乎有益將來且連彼處受害矣朕雖屢遣大臣來視而河工是非終無定論朕夙念河道頻壞羣黎屢罹災害因詳閱河圖不離左右故地

方隄岸河形朕衷深晰今朕躬特來觀閱試以朕意言之朕觀此河陜隘逼近黃河之岸且自徐州北鎮口閘所出黃水及微山湖荊山口之水俱歸內運河必流入中河駱馬湖之水亦入此河若遇霖潦之年水勢愈漲萬一黃隄潰決失於防禦中河黃河必將混而為一此中河開濬後小民商賈無不稱便者蓋由免行黃河一百八十里之險耳然此論徒知目前小利又安識日後長久有利無利也又

諭曰若重載與回空之船並行則中河窄狹且逼近黃河
朕意猶以為可慮鎮口閘微山湖等處水大可仍開支
河口其黃河運道原自不廢仍並存之

康熙二十九年庚午三月丁巳

上諭大學士等曰南旺湖之水自來流入運河朕去歲南
巡回鑾時沿隄而行細閱河勢知南旺湖之水至分水
龍王廟分流俱入南北運河當日始建隄岸之人經營
甚善今若使南旺湖之水盡入北流則南運河將至水

淺矣可傳從前勘河諸臣及靳輔問明回奏

四月戊寅

上諭倉場侍郎凱音布原任河道總督靳輔等曰山東河道自分水龍王廟以南流入運河之水不一而足舟行無阻分水龍王廟以北匯入運河者惟河南衛水而已並無別渠相濟南旺所蓄之水又不能多常致淤淺阻滯今將駱馬湖之水不令其自禹王臺流入沭河俾駱馬湖之水蓄貯無洩於運道有無裨益至駱馬湖與南

旺等湖相距地勢高低如何山東東阿縣之鹽河及別河有可通入運河者否河南衛河之外有別河可以疏入運河者否爾等訪其地諳練之人委曲諮詢若有可措施之處親加詳閱繪圖來奏

康熙三十一年壬申十一月戊辰工部等衙門議覆河道總督靳輔疏言於黃河兩岸栽柳種草設立涵洞應准行至挑濬河溝引水淤墊隄下積水之處又引水淤墊邳州低窪之處應令該督詳議

具奏

上曰引黃河水內灌使淤平窪地雖云有益朕斷不肯輕信黃河水勢危險脩爾彼處深此處淺脩爾船被阻淤水勢變遷無定不獨黃河為然即如渾河之水數十年前其流尚在南苑中未幾漸徙而南在蠡縣村落間猶去南苑未遠今則分為二支一支出新安一支出霸州其流愈遠矣朕曾聞土人云元朝欲引渾河之水通京師而未果想亦有所難行耳黃河水勢湍迅欲引黃河

內灌使淤平窪地事屬危險難保萬全不准行

康熙三十三年甲戌正月己未

上諭大學士等曰于成龍面奏雲梯關以下至海口因水勢散漫以致沙漸淤長朕思海口為黃河入海之路海口水勢迅急方能刷沙河水乃得順流此為緊要所當疏濬者也

十月甲寅工部等衙門議覆河道總督于成龍疏言高家堰三官廟周橋大壩一帶隄工所關甚鉅

土隄易為水勢衝壞請改建石隄以為永久之計
并請於近隄開一小河運送工料應如所請

上曰修此隄工所需之石從何處取辦應用此隄關係緊
要必須修築堅固方可無虞朕聞洪澤湖昔日俱係民
田因高家堰築隄淮水泛溢遂爾成湖彼時之民未必
不怨今高家堰隄理應修固但需用石料浩繁若運辦
不得法恐致累民雖動正項錢糧給價募僱然地遠工
繁或仍派於民減給工價亦未可定朕前南巡觀覽此

隄極為緊要惟恐擾民故爾躊躇必詳悉籌畫方可舉
行至開運料小河九卿所議殊未明白河道關係甚大
朕從十五歲即為河道憂慮今欲開小河必指高家堰
相近之處往年靳輔亦欲於高家堰另築一隄於中浚
小河令從兩隄間通流運送工料九卿以兩隄之間浚
河則舊隄兩面受水衝溢議不准行今于成龍請開運
料小河即靳輔欲開小河之處若將此開濬勢必引入
洪澤湖之水浸潤衝刷兼之湖水泛溢河水盈漲高家

堰斷不能保況修堤土石並非高郵等處所出與其於
小河以小船載運何如即由洪澤湖以商賈大船載運
耶

康熙三十五年丙子九月辛酉先是

上以淮黃交漲遣戶部員外郎綽奇往閱黃河水勢至是
回奏中河北岸之隄未遭水患其水已減六尺

上諭大學士等曰向朕逆料中河北岸之隄最為緊要定
須堅固因命靳輔于成龍加意修治是以雖遇大水得

無妨害若此隄一決不可言矣歷年之水無有大於今
歲者此番無害則似可永固黃河之水從雲梯關入海
雲梯關沙漲壅塞水每為其所阻以致退流河隄不能
捍禦因而衝決今將淤泥挑濬河道加深所以水得通
洩其利溥矣

康熙三十六年丁丑正月甲戌江南江西總督范
承勲河道總督董安國等疏言臣等會勘河道自
永安以至邳宿二州閭王廟一帶亟宜修築

上諭大學士等曰河道事務關係甚大不可遲延俱著依該督等所奏速行修理雲梯關乃海口要地此處淤沙深濬則黃河入海不致阻滯著總河每年遣才能河員專理毋致壅塞

康熙三十七年戊寅七月乙未工部議覆漕運總督桑額等疏請開濬下河應准行

上諭大學士等曰下河入海之處朕雖未及親覽嘗聞人云鹽城一帶地極窪下海水反高建閘無益倘河高海

低水性趨下雖不疏濬勢必決開一道以歸於海明代
於海口設閘遇河水高則啟閘以注諸海河水平則閉
閘以禦海水前雖特令于成龍凱音布修治毫無裨益
今桑額居官雖優但此事非親身閱歷加意推詳者難
以懸擬必深悉水性洞徹地形之人方可定議爾等問
九卿并淮揚等處人在朝者確議具奏

己亥大學士等奏開濬下河九卿及在朝淮揚人
等俱言開濬有益

上諭直隸巡撫于成龍曰爾意若何于成龍奏姚二沿船
廠蘆壩等河若行挑濬於民有益

上曰朕幸五臺山回欲觀渾河清河因由霸州而來朕意
渾河清河俱匯流霸州城南原欲沿河修築隄岸不意
至霸州詢地方百姓據云渾河原經固安縣後因遷徙
匯合清河流至霸州二河水勢浩大以致泛濫為災朕
遂一從民言於固安縣開河事乃有成朕並不固執已
意爾等為總督巡撫者能如朕之不固執乎然此河道

甚短易於修治南省地方窪下水勢浩瀚難於修築不
比此河今若挑濬姚二沿等河爾果能保與民有益否
著桑額與總督巡撫會同確勘定議具奏

十一月乙酉

上諭大學士等曰開濬下河民生攸繫朕為閭閻疾苦深
切軫念曾命凱音布孫在豐于成龍王新命等專司開
濬伊等俱奏工程告竣民生大蒙利益載在冊籍存部
可考人亦俱在可以質詢也由今觀之止是虛糜國帑

水勢並未消減田畝並非涸出所謂有益民生者果何在耶今桑額又奏當行開濬而九卿並不詳詰從前開濬諸人亦不稽考冊籍遽議准行如果此次開濬巨浸全消疆理盡復民生得濟朕即如其所請疏鑿開濬而桑額等能保水即消田即出有裨於民乎御史吳甫生亦以此事條奏可并發九卿詳詢前此督濬者復稽考諸冊籍確議以聞

十二月辛丑朔

上諭河道總督于成龍曰聞淮揚河水泛漲清江浦百姓所居之地皆已被水夫洪澤湖實黃河之障湖水強盛力可敵黃則黃水不得灌入運河今淮水勢弱不能制黃金注運河黃水又復灌入且兩河相距甚近清江浦地處其中其一帶地方受泛溢之水勢所必然惟淮水三分入運七分歸黃運道始安

是日

上諭大學士等曰朕昔年巡視河工曾至大墩隄步行十

五里詳加閱看今寰宇昇平海內寧謐惟河工關係運道民生朕數十年來夙夜縈懷留心研究故河道情形熟悉已久總之上流既理則下流自治矣桑額所奏開濬下河一事朕不即允行正是有益於彼桑額固居心平和為人誠實然遇事不免遲鈍易被人欺如此紛繁事務何以責其成功于成龍屢委以事尚克勉効河工事情緊急與于成龍勅書內須入各部不得掣肘之語使得相機料理庶不悞事河務浩繁于成龍年已漸老

且一身難以兼顧奉天府尹徐廷璽曾任河工尚屬諳練著令前往協理河務

康熙三十八年己卯三月庚午朔

上巡視高家堰等隄

諭大學士等曰朕畱心河務體訪已久此來沿途坐於船外審視黃河之水見河身漸高登隄用水平測量見河較高於田行視清口高家堰則洪澤湖水低黃河水高以致河水逆流入湖湖水無從得出泛濫於興化鹽城

等七州縣此災之所由生也治河上策惟以深濬河身
為要諸臣並無言及此者誠能深濬河底則洪澤湖水
直達黃河七州縣無泛濫之患民間田產自然涸出不
治其源徒治下流終無益也今朕親閱下河通海之口
及射陽湖一帶填淤之處于成龍所帶効力人員甚多
可作速分委并力開濬蓄積之水倘能稍洩庶幾有益
至於黃淮二河交會之口過於徑直所以黃水常逆流
而入今宜將黃河南岸近淮之隄更迤東長二三里築

令堅固淮水近河之隄亦迤東灣曲拓築使之斜行會
流則黃河之水不至倒灌入淮矣再河流不迅急無以
刷去河底之沙朕詳加諮訪河直則溜自急溜急則沙
自刷而河自深宜於清口西數曲灣處試行濬直如直
濬有益漸將上流曲處歲加直濬庶幾黃河之險自除
而河底漸深洪澤湖之水漸出七州縣之水患可漸息
矣清口應修之處著于成龍等繪圖呈覽

是日

上諭漕運總督桑額河道總督于成龍協理河務徐廷璽等曰朕念河道國計民生攸關親行巡幸由運河一帶以至徐州迤南細加看閱見黃河底高灣多以致各處受險至歸仁隄高家堰運口等處見各隄岸愈高而水愈大此非水大之故皆由黃河淤墊甚高以致卽年漫溢若治河僅築隄防不將黃河刷深終屬無益且運口太直黃河倒灌兼之湖口淤墊以致清水不能暢流各河與洪澤湖之水如何能敵黃水若將清河至惠濟祠

埽灣由北岸挑引從惠濟祠後入河而運河再向東斜
流入惠濟祠交匯黃水自然不倒灌矣朕欲將黃河各
險工頂溜灣處開直使水直行刷沙若黃河刷深一尺
則各河之水淺一尺深一丈則各河之水淺一丈如此
刷去則水由地中而行各壩亦可不用不但運河無漫
溢之虞而下河淹沒之患似可永除矣且攔黃壩灣曲
馬家港窄狹雖將時家馬頭之口堵築而淮水不能暢
流山陽南岸韓家莊等處險工甚屬可虞今應將清口

之西壩臺添挑水壩比東壩臺加長包裹清口在內擇
洪澤湖水深之處開直成河使湖水流岀黃河灣曲之
處直挑引河使各險處不得受衝至於下河現有積水
不得不引出歸海將串場河射陽湖蝦鬚沙溝一帶挑
通引積水流岀歸海攔黃壩應行拆毀時家馬頭決口
俟黃水流定汰黃隄築成之日再行堵塞至歸仁隄之
建專為毛城舖等處水漲衝決於此攔回仍歸黃河之
意此隄亦應酌量修築爾等務必將各州縣水災盡除

方不負朕南巡救民至意若挑挖引河原有工程仍照舊令各官修防不可怠忽俟引河工竣黃水歸入故道再將下河串場河射陽湖蝦鬚沙溝一帶挑通引積水流歸海而河道永無衝決矣

庚辰

御舟泊新豐

諭河道總督于成龍曰朕自淮南一路詳閱河道測算高郵以上河水比湖水高四尺八寸自高郵至邵伯河水

湖水始見平等應將高郵以上當湖隄岸高郵以下河之東隄俱修築堅固有月隄處照舊存留有應修隄岸仍照舊隄堅築至於邵伯地方因無當湖隄岸河湖合而為一不必修築隄岸聽其流行高郵東岸之滾水壩涵洞俱不必用將湖水河水俱由芒稻河人字河引出歸江入江之河口如有淺處責令挑深如此修治則湖水河水俱歸大江各河之水既不歸下河下河自可不挑濬矣

甲申

上諭大學士等曰朕巡閱河道將高郵州之湖與河水比
量河水高四尺餘夫湖水既低四尺有餘縱水長一丈
亦不至泛越且湖水亦斷不至高長丈許朕意欲暫留
毛城鋪高家堰等處減水壩將高郵州以北減水閘壩
盡行堵塞高其東岸隄防修築堅固使在西之水不得
泛越則下河之水歸海而河道湖身皆出其時作何導
濬再行定奪至於邵伯以南河湖合流奔江歸海想不

至於衝決其他處河道朕亦可保無虞獨黃河工程尚難決定相其形勢當緩圖之

七月庚午

上諭河道總督于成龍曰朕觀河圖緊要應修者兩處前在南方曾面諭爾將人字河芒稻河急行挑濬聞至今尚未動工甚屬遲悞又河圖內歸仁隄便民間等口俱已堵塞毛城舖迤下各口尚未堵塞既將便民閘等口堵塞則毛城舖等口所出之水由何處洩出必致散漫

各處民大受害此處關係緊要宜速議奏聞

九月戊申

上以于成龍所繪河圖示大學士等

諭之曰今四海太平最重者治河一事朕前巡視知水之
不治皆由洪澤湖水勢甚大既不能洩又加黃運兩河
合并勢愈浩瀚以致泛濫昔時原有歸仁堤遙為捍禦
此法最善今已淹沒不可考靳輔則築減水壩名為減
水而四處奔瀉漂決甚多彼但顧上河而不顧下河水

何以治朕意惟有導河稍北使彼不得侵入清水而疏洩洪澤湖使之下流全用清水以刷沙淤如此則水自無不治矣今歲南巡見黃河逼近清口黃水倒灌以致淤墊洪澤湖水不出自高家堰減水壩流入高寶諸湖自高寶諸湖流入運河以致下河田地盡被淹沒淮揚所屬錢糧雖頻年蠲免賑濟動帑修理隄岸羣黎尚在水中朕深為軫念遂諭于成龍將洪澤湖出水隄岸令速完工近差工部官員往看清口仍然淤墊洪澤湖水

仍未出口隄岸尚未告竣清口甚為緊要如不將清口挑濬湖水不出高家堰并運河隄工雖加高厚均屬無益爾等會同九卿詹事科道詳閱河圖速議具奏

癸未

上諭大學士等曰原任河道總督董安國所濬引河及挑水壩著發正項錢糧修理給事中張睿條奏中河之水由仲莊閘口流出直射湖口故不但清河水難出即黃河之水反易流入所言甚是于成龍疏內並未叙及朕

觀于成龍但以修隄為要務若朕意則以決出清河之水為是爾等再議著于成龍親至仲莊閘詳視議奏

甲申

上諭大學士等曰朕撫御寰區愛養兆民務期人各得所比年淮揚所屬地方罹於水患百姓田廬俱被淹沒生業蕩然深切軫念屢經蠲租賑濟乃黃河墊高清口低下淮水不能流出百姓仍被水災念此淮揚數州縣生靈豈可不急為拯救乎今或堅修高家堰隄岸以束淮

水使之刷黃或移清口於清江浦之左右或另濬河道以通舟楫俱宜一一講求此事關係甚鉅爾等會同九卿詹事科道細閱河圖詳議具奏

十一月乙巳

上諭大學士等曰于成龍奏稱清江浦西界黃水高於淮水一尺淮水高於運河之水七尺運河之水高於平地七尺合而觀之淮水高於運河西隄外平地共一大四尺今惟以清口自河之下流沿武家墩由清江浦之北

另行改移中間河身量留八九十丈空地兩旁堅築石隄俾清水暢達此所當急議者夫清水建瓴迅下則易出黃水不致倒灌其石隄之間已為河身不煩挑濬即水漲之時其高不過等於運河安能泛越高家堰哉但如是改移朕恐別有所礙不能永遠故少為躊躇耳爾等確議具奏

是日工部等衙門議覆河道總督于成龍疏言挑挖爛泥淺等處及速完高家堰隄工應如所請

上曰河工關係甚大高家堰隄岸縱多方堅築清水亦不能出今惟當議移清口於他處兩岸俱用石工堅砌使清水流通朕南巡時曾以另開清口面諭于成龍彼亦奏稱淮水可從武家墩向清江浦移改此事著河道總督于成龍及府尹徐廷璽會同河道各官親看清口當移於何處即行詳議於歲前具奏

丁未

上諭大學士等曰河圖繪於紙上平漫難辨高下朕欲改

清口刻木製成一圖觀看易明著侍郎常綬前往河工會同于成龍清口應否改移詳加看閱歲內著速回具奏

十二月辛巳奉差勘閱河工工部侍郎常綬等回奏

上諭大學士等曰據于成龍等之意以為改移清口清水固易宣洩遇水泛時新修隄岸難保無虞必將高家堰減水壩盡行堵塞而加築之始有裨益洪澤湖原係陸

地於此處築隄蓄水與山東嶧山湖南旺湖相同大水之年納之以蓄水大旱之歲出之以助運彼時河身窪下故洪澤湖水一則敵黃一則濟運今歲久沙壅黃河底墊不但黃水反高於清水清水勢不能出而黃水復致倒灌於是洪澤湖底亦漸淤墊高地丈餘水面上浮矣此清口所以淤塞也爾等會同九卿確議各陳已見直言勿隱

壬午大學士等會議河工事務入奏將給事中陳

詵以深濬河身為要繕摺呈覽

上曰河身宜加深濬人所共知但難得其法耳朕亦留心於此今永定河雖小彷彿黃水欲以水力刷濬之法試之使河底得深十月間往視之時曾諭李光地等令將河身束之使狹堅築兩邊隄岸若永定河行之有效即將此法用之黃河否則另當設法安可輕舉九卿內如有淮安揚州人令各抒所見奏聞侍郎李枏奏曰高家堰之隄一決則淮安揚州一帶難保無虞請將高

家堰堤工速加增修

上曰洪澤湖之水長勢不得不將高家堰增築待加築高
家堰後試觀清水由清口出否至於邵伯衝決之口若
不預行修築則明春更可慮矣又

諭曰若將高家堰減水壩堵閉建造滾水壩土隄加幫高
厚則湖水必高黃水又大湖水不出之時高家堰隄工
危險而泗州等處必至水淹爾等會同九卿詹事科道
確議具奏

康熙三十九年庚辰三月丁未

上諭河道總督張鵬翮曰海口至清口相隔遼遠今所急者清黃相會之處最為緊要黃水高故清水不得通洩曩者高家偃去水尚遠今與培築隄岸相平但令清水何以得出河身何以得深此係爾當圖畫効力者更樓口亦屬緊要所宜速為修竣水老鸛等物靳輔當時亦曾用之毫無裨益此數事爾到任詳察宜作何舉行再為奏聞朕以爾清廉因特簡任所發錢糧仍於河工支

用隄岸自然堅固事無不濟矣

康熙四十年辛巳七月己丑

上諭大學士等曰前河道總督于成龍具疏欲將高家堰
六壩堵塞蓄湖水以敵黃水疏通清口因遣尚書范承
勳等堵塞六壩頃因巡撫高承爵題報泗州盱眙水災
朕敕張鵬翮會同江南總督阿山踏勘情形將泗州盱
眙泛溢之水設法修治作何賑濟蠲租又以洪澤湖水
泛漲高家堰隄工恐致危險作何保守堅固著張鵬翮

陳奏乃張鵬翮疏稱泗州盱眙水災自古已然即六壩全開泗州等處亦被水災且六壩既閉高郵寶應等州縣田地涸出民得耕種皆河伯效靈所致朕著張鵬翮會同阿山將泗州盱眙泛溢之水作何設法築隄幫修或賑或蠲俱有益於災黎並非欲開高家堰六壩救泗州盱眙之民而令淮揚百姓罹於水災也朕念黃河運河關係國計民生三次看閱河工屢次簡任河臣修築隄岸每歲不惜數百萬帑金夏月雨水時晝夜憂慮不

時遣人看視凡被水之處截留漕米盡出倉糧賑濟總
為拯救災黎豈止救泗州盱眙之災而淮安揚州等處
百姓聽其罹災乎今現有居住賀蘭山後公雲木春來
朝見朕問河西雨澤黃河水勢雲木春奏今歲自正月
至六月滴雨未降黃河水消二丈有餘此實因黃河水
小清口之水幸而得出並非伊効力之所致也統一天
下之主坐視災黎不為拯救有是理耶


十二月庚午

上諭大學士等曰高家堰等處隄工雖竣然未遇大水俟
來年經過水汛之後方可驗其成功若爛泥淺一帶水
出不暢則高家堰究屬可憂向意欲從武家墩出水此
事尚須酌之前日問張玉書奏稱淮水尚大舊隄俱為
湖水所浸此則泗州盱眙安得不被水災河身之淺深
以洪澤湖水之高下為驗湖水低得一尺河身方深得
一尺今洪澤湖之水比甲子年高有數尺可見河身未
曾刷深高家堰之隄恐過此以往尚未可知也

第 一 卷 第 一 章

三

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十三



總校官庶吉士臣張能昭

校對官檢討臣李學鉅

謄錄監生臣費恩公

欽定四庫全書薈要

史部

聖祖仁皇帝聖訓卷三十四

五

詳校官編修臣繆晉

欽定四庫全書薈要卷七千八百四

史部

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十四

治河二

康熙四十一年壬午五月壬辰戶部題江南賑濟
盱眙等三縣水災饑民米數

上曰前議加築高家堰堵塞唐埂六壩時朕曾言如此修
築雖有濟於下流其上流州邑必致衝決今信如朕言

觀此散糧之事盱眙等三縣大被災害若昔議築高家堰之日於此處亦築一隄束其水勢不令泛溢豈不甚善該督斯時慮不及此卒令此等地方悉受泛溢之水今欲修難矣其令張鵬翮往勘以聞

九月甲子河道總督張鵬翮疏言桃源縣烟墩一帶因對岸沙灘挺出河心逼溜南行恐被衝刷請於北岸邵家莊開挑引河建築草壩以分水勢又顏家莊水勢逼射北岸亦請開引河一道則水流

順下而險工不受衝激矣

上諭大學士等曰此本若敕部議必致遲延著即照所題行朕觀永定河修築之法甚善河身直河底深所以淤沙盡皆衝刷今治黃河亦用此法方為有益此工多費不過十萬兩試照永定河修治之

丁卯河道總督張鵬翮疏報秋水情形

上諭大學士等曰覽奏挑水壩築成逼黃河大溜直趨陶莊引河循北岸而行黃水從大通口暢出海口極其深

通淮水從清口暢流敵黃絕無黃水倒灌之患高家堰隄工完固加謹防守經伏秋大漲俱獲無虞運河水由涇河澗河人字芒稻等河分洩各處工程亦皆保固觀此河工大有望矣又

諭曰今所開陶莊引河甚善朕巡視南河時曾令員外郎黑碩色將引河之樁加意深築其疏濬人字芒稻二河亦佳得此二河運河甚為有益朕觀明朝治河俱自徐州以上在河南地方修築我朝自康熙元年以來俱在

徐州以下修築然治下流須預防上流若上流潰決下流必至壅滯嗣後徐州以上地方河臣亦當留意再黃河之水遷徙無定朕前在寧夏之時見黃河大溜每年更移今年在此來年又移他處其性如此況九河故道原在河間地方後漸移向南歷代以來果能每年防禦相機修理則河道何至如此大壞皆因時當多事或十年或五年不修築不開濬所以漸難治矣明朝三百年間嘗講求河工治法彼時措置亦得其宜如山東微山

湖將水蓄聚山中澇則蓄之旱則洩之皆深有益於治河者也

康熙四十二年癸未二月庚辰

上巡視河工舟泊天妃廟

諭河道總督張鵬翮曰歸仁隄引河用以分洩洪澤湖之水勢若黃水加長則恐清口水弱著將祥符閘下板堵閉草壩將五堡閘酌量開放以助清水之勢

三月戊申

上諭河道總督張鵬翮曰高家堰工程關係重大保守最為緊要朕今日乘舟由洪澤湖閱視見有殘缺石工以葦草鑲填倘遇水發危險堪虞至六壩見新修石隄堅固方慰朕懷其殘缺石工著即興修乘水未長之先完工用資捍禦至高家堰防險之人用候選縣丞經歷等微員此不過例監書辦出身家產微薄倘有疎忽干係不小須於候選官員內擇其職銜稍大身家殷實者委令防險如此則彼知自愛身家又有選用之望自能盡

心防守有裨工程

十月己卯

上諭大學士等曰朕觀河道已治河道總督張鵬翮及河工官員俱甚効力黃河一切工程朕知之甚悉先是永定河用埽甚有裨益是以朕諭張鵬翮黃河亦宜用埽張鵬翮回奏永定河勢小可以用埽黃河勢大難以用埽朕諭姑用之張鵬翮因而用埽河隄今果堅固至於洪澤湖水勢甚險而隄岸復高往來舟楫一遭漂沒人

命輒難救援朕曾諭沿岸將長木樁斜釘於水中船雖漂沒人尚可攀援獲命俟於釘樁後驗之

是日

上諭吏部工部黃淮兩河關係運道民生最為重要朕念治河國家大事夙夜厪懷未嘗少釋披圖咨衆雖已悉其源流顧水勢變遷不常必確知洞悉方可實見施行是以不憚勤勞屢親巡閱察其險易之形勢審其疏導之機宜緩急次第俱有成畫至於簡命河臣倚任甚切

凡所屬官吏皆聽舉用大修工程費以數百萬計歲修帑金亦以數十萬計乃康熙三十七年黃淮並漲河道總督董安國不堅築隄堰疏通海口因而河身墊高溢出河岸以致倒灌洪澤湖口湖水從六壩旁洩由運河入下河淹沒民田於是罷董安國以于成龍代之朕隨授以治河方畧詳加指示康熙三十八年親往閱河駐蹕清口河干又面諭于成龍清口宜築挑水壩挑黃水使趨北岸方可免倒灌清水之患隨指定其地再三申

命于成龍不遵朕旨致無成功及用張鵬翮為河道總督面諭云頃已發帑金數百萬令大臣官員往高家堰築隄閉六壩使逼洪澤湖水暢出清口而清口築挑水壩尤為緊要此壩不築則黃水頂衝斷不能使向北岸湖水必不得暢流張鵬翮遵奉朕言壩工築成黃溜遂直趨陶莊清水因以直出疊經伏秋大漲並無倒灌之事其浚張福口等引河築歸仁隄疏入字芒稻涇澗等河開大通口皆遵朕旨一一告竣今年春朕閱河至挑

源見龍窩等處頂衝危險命增築挑水壩壩工刻日訖
事河勢遂平中河仲莊閘口以與清口相對特命改由
楊家莊漕輓安流商民利濟曩時黃水泛漲或與岸平
或漫溢四出今黃河深流河岸距水面大餘縱遇大漲
亦可無虞矣張鵬翮所修工程雖悉經朕裁斷而在河
數載殫心宣力不辭艱瘁又清潔自持一應錢糧俱實
用於河工無纖毫浮耗朕心深為嘉悅所屬大小河員
並皆勉力赴工共襄河務亦屬可嘉自總河以下各官

爾二部即加議叙具奏

康熙四十四年乙酉二月庚寅

上巡視河工舟泊土橋閘

諭大學士等曰河道總督張鵬翮昨日來問以河工形勢
彼云河已治矣從前駱馬湖口設竹絡壩湖水大則從
壩流入黃河河水大則溢流入壩內今竹絡壩止有湖
水暢流黃水並無浸灌則黃河之深通可知聞下河等
處地方連年皆大熟亦從前所未有也

三月乙巳

上諭河道總督張鵬翮曰河工已經告成善後之策更爲緊要朕今親臨閱視修建天妃閘甚當倘黃水長至五六尺而清水不長則勢弱不能敵黃黃水倒灌亦必致之理豈可因此即謂治河失策乎若遇倒灌即將天妃閘暫時下板蓄清水全力以敵黃流不過數日黃水即退遇糧船過時即起板開放若黃水不灌入不必下板其惠濟祠一帶雖建有石工但運河與黃河止有一線

之隄若黃溜衝刷石工恐不足恃可於上下適中之處相度形勢修建挑水壩三四處挑溜開行其王公隄亦應相度形勢修建挑水壩上運河東堤保守最為緊要隄岸應行加幫其高郵迤南湖河水勢相平界首迤南河水高於湖水東西兩隄卑薄應加幫修可量建石工淮安近城隄岸卑薄之處亦應相度形勢修建石工黃河南岸隄工關係緊要應加謹修防至於直隸山東之河與河道總督相距甚遠應照河南例各交與該省巡

撫就近易於料理其楊村通判並無經管之事應行裁去爾會同行在九卿速議以聞

壬子

上諭河道總督張鵬翮及河工官員等曰今河工雖已告成不可不預為修理防護以圖善後之策朕見淮揚一帶隄岸卑薄未甚堅固倘不加保護以致衝決則淮揚地方百姓何以能堪爾等宜急籌之

閏四月癸卯

上幸高家堰遍閱河隄

諭河道總督張鵬翮曰朕於康熙四十二年臨閱高家堰時爾奏石隄可於八九月間告成今已三年尚未完工萬一水大奄至恃此草埽詎能禦之張鵬翮奏曰必能保固斷然無害

上曰草埽俱經二三年矣腐爛沈塌者多猝遇大水事難預料如不謹慎修築被水衝決枉費錢糧姑置無論但去年已奏河工告成今年又奏衝決其謂之何爾須日

夜謹守保護夫治河莫要於得人觀爾所用之人每多有失豈可倚任此輩分守此隄耶爾等惟見清口之水暢流即以為功成不思防禦倘高家堰六壩之水泛溢則清水力弱而黃水必復致倒灌矣夫高家堰關係緊要宜謹識之毋忽

是日

上幸惠濟祠閱視畢

諭大學士諸大臣及河臣等曰朕畱心河道親閱者屢矣

河之形勢必身歷其地始知成功之次第朕每至河上必到惠濟祠以觀水勢康熙三十八年以前黃水泛溢凡爾等所立之地皆黃水也彼時自舟中望之水與岸平岸之四圍皆可遙見其後水漸歸河岸高於水今則岸之去水又高有丈餘清水暢流逼黃竟抵北岸黃流僅成一線觀此形勢朕之河工大成矣朕心甚為快然也

乙巳

上諭河道總督張鵬翮曰惠濟祠前植標杆處可建挑水壩祠後埽灣處亦宜建挑水壩以保淤灘但此二處挑水壩俱不宜太長恐逼水盡向北岸有礙楊家莊河口至卞家莊舊壩修建甚佳再畧加寬長更善

丙午

上諭河道總督張鵬翮曰九里岡隄工修理得法不似從前直埽不能挑溜今修魚鱗埽逐段挺出逼溜開行使窪處漸淤此法甚善其埽工釘椿處可再建挑水壩二

座若恐水深則先建磯嘴壩形出水俟其壩下漸淤層次加修則料不加多而功易成矣

七月壬申

上諭大學士等曰今春朕欲親閱高家堰張鵬翮奏稱隄岸工程俱完又時當炎暑蚊蟲正起求停止親閱懇奏再四朕以高家堰關係甚大親往閱視見石隄尚有未完之處所下之埽已經二三年者朽爛亦多將此情形一一指示張鵬翮及河工諸臣朕又諭張鵬翮大水時

發難以預料爾務須晝夜防護至分守隄工人員委用不當朕亦諭及今據張鵬翮疏報古溝唐埂清水溝韓家莊四處隄岸衝決河工將有復壞之勢大小河員惟知清水暢流為已功而不知高家堰之六壩水洩太多則清水力微黃水必復倒灌也此事著九卿詹事科道速行會議具奏

丙戌

上諭大學士等曰凡人必試之而始知張鵬翮多疑今即

遣旗員前去未嘗一試而張鵬翮早疑其不清人亦何
心為彼効力夫高家堰之隄全當洪澤湖之水開六壩
雖民田畧有衝沒淮揚地方斷無可虞如以為利益民
田而閉六壩萬一大水驟漲而隄決淮揚大有可虞矣
是以前總河靳輔開六壩以注水漲張鵬翮但知閉六
壩則運河民田均有益而不知為淮揚之大患高家
堰之所關甚為緊要也

十月甲午

上諭工部方今海宇昇平惟以安阜黎元為急東南要務莫重於河防朕數經南巡指示修築方畧凡以籌運道濟民生也自曩歲兩河先後衝決而黃流淤墊繼以高家堰唐埂六壩久決未塞而洪澤湖水直從決口旁洩以致淮水力弱黃水倒灌全河幾至潰壞於是分遣廷臣發帑金數百萬增築高家堰盡閉六壩俾淮水全注清口又特築挑水壩以逼黃溜趨向北岸仍開濬陶莊引河以導黃北流然後無倒灌之患康熙四十二年以

河工漸可底績躬親臨視時高家堰石工尚多未竣飭令迅速修築又因仲莊閘水勢湍急恐逼黃流倒浸清口遂命閉仲莊閘改建楊家莊閘閘工既成今年春復往巡閱比至高家堰見石工仍未完固舊埽亦多朽塌諄諭河臣張鵬翮謂水勢無常修防宜豫一有疎忽則前功盡隳且甫奏安瀾旋報衝決天下其謂之何張鵬翮奏稱隄工捍禦可以無虞迨伏汎大水驟發果衝決古溝唐埂清水溝等處淮揚一路田畝被淹者甚多今

已嚴飭堵塞決口刻期竣工朕屢親莅河干詳度形勢當水漲之時若高家堰及運河減水壩不令開放則隄堰甚為危險若開壩宣洩則閭閻隴畝必致淹傷方春水涸民間盡皆播種一經夏水驟漲開壩放流而所播之種盡皆淹沒朕心惻然殊為不忍使不設法導流俾水有所收束則瀕湖及下河民田究不免水患朕再三籌畫宜於高家堰三壩之下挑濬一河兩旁築隄束水引入高郵邵伯諸湖湖外亦量築土隄不使漫溢其高

郵減水壩亦挑濬一河兩旁築隄束水由串場河入白
駒丁溪草堰等河白駒等河淤淺之處並開濬深通俾
之入海如此則各壩所出之水不致有渙散衝流之害
又洪澤湖水勢大漲泗州盱眙等州縣俱被水災應於
泗州一帶受水之地亦酌量築隄束水毋令泛濫則所
全於淮安揚州鳳陽三郡民生者多矣此事原於河道
無涉在河官止知保護河道不復詳計民生朕惟民間
田畝所繫甚重宜圖萬全可久之策築隄束水行之北

河業有成效則施之南河當亦有濟應從何處築隄延
袤若干里需費幾何行令江南江西總督漕運總督河
道總督江蘇巡撫會同確勘詳議具奏

康熙四十五年丙戌正月己巳工部等衙門議覆
江南江西總督阿山等疏言河工重大需餉浩繁
伏候

皇上親臨河上指示方畧

上諭曰朕屢經躬閱河道凡河工利病地方遠近應分應

合應挑應築之處知之甚明雖有未及經歷之地而向來輿圖地名熟悉於衷亦可即行定奪過者數次南巡見與陸路不同瀕河官民不無勞擾因此朕不必親往閱視阿山桑額張鵬翮等所看已屬周晰但此項工程不應交與總河修築應多派大臣官員分工速修

已知

上諭大學士等曰朕昔親臨河上欲往下河因張鵬翮奏言斷不可往是以中止今即去仍然不能親蒞其地則

亦何事復往但河工錢糧斷不可交地方官當照山東賑饑之例將八旗官及部院官內有行止端正者令該旗大臣及部院堂官多行保舉派出再將江寧鎮江杭州駐防旗員亦著該將軍副都統保舉派出或副都統或協領帶赴工上其京城派出官員領戶部錢糧帶往各省派出官員各就近地領錢糧帶往可派大臣督理工程所派官員每人各給銀三千兩務令照三千兩工價分地開工如此始得河務速成有利民生著九卿再

議具奏至高家堰若不預行修治必有可虞已有旨諭張鵬翮而彼堅稱斷斷無慮若今年不修治高家堰倘有衝決即開河何用此兩事中高家堰尤為緊要爾等可將諭旨付挑河大臣轉交張鵬翮一并議奏

壬午工部等衙門覆奏挑河事宜

上曰爾等所議尚有未詳至將情願往河工効力者令照山東養民例尤為不可山東養民者名為捐助及其後皆無實際所欠銀兩皆朕豁免況所去人員亦甚放縱

今挑河之事俱有丈尺稍或不實即悞公務而前去人員若仍行放縱尤貽害於地方爾等於嚴行禁止之處並未議及著再議具奏

五月戊午朔

上諭大學士等曰去歲巡視南河曾於衆人前言高家堰隄工不堅尚宜增築張鵬翮以河工已完斷然無害朕謂爾雖言工完朕不能信及後隄工潰決幸是唐埂六壩上流若在下流衝決如何堵禦康熙七年九年二十

二年七里溝清水潭龍窩等處衝決之時其水甚大去年水不甚大然而衝決者河臣自以為河工已完玩忽之所致也

十月辛丑

上諭大學士等曰河道總督報秋汛疏二十日方到朕屢次親閱河工洞悉情形如奏報水汛事早到則其中或有所指示猶可及時預防嗣後有奏河工急務者限兩三日飛馳遞送

康熙四十六年丁亥二月癸卯

上巡視溜淮套駐蹕曹家廟地方

諭扈從文武臣工及河道總督等曰前阿山等察勘泗州水勢奏稱溜淮套地方另開一河出張福口可以分洩淮水免洪澤湖之異漲保高家堰之危險繪圖進呈請朕親閱在廷諸臣亦以河工事關重大再四懇請朕始親行今詳看地勢甚高雖開鑿成河亦不能直達清口且所立標竿多有在墳上者若依所立標竿開河不獨

壞民田廬甚至毀民墳塚朕惟恐一夫不獲其所時存
已饑已溺之心何忍發此無數枯骨數年來兩河平靜
民生安樂何必多此一事先年靳輔開中河以避黃河
之險確有成效然亦止因舊河身疏濬今若欲開濬溜
淮套必至鑿山穿嶺不惟斷難成功將來汎水泛溢不
漫入洪澤湖必致衝決運河矣又

諭曰明代淮黃與今迥別明代黃水勢強淮水勢弱故有
倒灌之患朕自甲子年南巡閱視兩河形勢漸次修治

今則淮強黃弱矣然善後之策尤宜亟講與其開溜淮套無益之河不若將洪澤湖出水之處再行挑濬令其寬深使清水愈加暢流至蔣家壩天然壩一帶舊有河形宜更加挑濬使通運料小河俾商民船隻皆可通行即漕船亦可輓運為利不淺矣

乙巳

上諭河道總督張鵬翮曰爾身任總河河工事務漫不經心今又以溜淮套地方可以開河請朕親臨殊屬欺誑

張鵬翮免冠謝罪懇

恩寬宥

上曰賞罰者國家大權內而九卿外而督撫原為盡忠於國惠養斯民而設非徒使之榮顯晏安而已大吏廉潔則小吏自然效法苟不能勤慎致悞公事豈可因保全一人而廢國法乎凡事有可以保全者亦有當用剛斷者國家臣工甚多姑息一二人何以服衆朕自甲子年至今六次南巡詳觀河形一年異於一年治河之道當

看何處關係緊要便保守何處不可執一自古治河皆順水性為今之計但當使淮水稍洩其流乘水未長時預為綢繆將來水雖大長必不致於危險天然壩一帶舊有河形當挑濬此河酌量可容糧艘建立閘座水小則閉閘蓄湖水以敵黃水大則開閘使之暢流一面由武家墩通至運河一面通至高郵湖則商民船隻皆得長行爾即公同在河能員定議具奏

五月癸丑

上諭河道總督張鵬翮等曰古今治河形勢不同舊時常患清水不足敵黃水每有黃水倒灌之虞今清水敵黃水有餘運河清水甚大反流入高郵湖設高郵湖水長溢入運河則運河東隄受險少有疎虞雖堵塞不難而生民田廬不可問矣應加謹防護以保無虞清口湖水七分敵黃三分濟運今應將大墩分水處西岸草壩再加挑寬大使清水多出黃河一分少入運河一分則運河東隄不致受險又於蔣家壩開河建閘引水由人字

河芒稻河入江新修五里滾水壩由下河及廟灣等處
入海不惟洪澤湖之水可以宣洩而盱眙泗州積水田
地亦漸次涸出水小則下板蓄水以敵黃水大則啟板
洩水且便於商民舟楫往來其祥符閘口門甚窄狹趁
此黃水不甚高之時將歸仁安仁利仁三閘委幹員改
寬洩水則徐州一帶民田可無淹沒之虞矣

康熙四十七年戊子五月辛巳工部議河道總督
張鵬翮疏言高家堰下山陽盱眙二處增設救生

橋銀兩請另行設法不動庫帑應無庸議

上曰朕南巡閱河見洪澤湖風浪危險隄岸陡立商民船隻觸石損壞傷人甚多朕心時切軫念因特令河臣沿河隄創設救生木橋自設橋以來數年內並未損船傷人於商民大有裨益此橋應時加增修愈多愈善嗣後著江寧蘇州杭州三處織造每歲於節省銀內各捐五百兩解送總河衙門以備救生之用該省逐歲增修存案不必奏銷如不實行修理於別項支用者從重治罪

康熙四十八年己丑十一月庚寅

上諭戶部尚書張鵬翮曰河工雖奏績然不可一日不防
倘兩隄稍有疎忽則前功盡棄蓋河源出於崑崙朕曾
遣官往視上流水長則陝西河南江南之水俱長知之
甚詳爾可宣旨趙世顯令行文川陝總督甘肅巡撫倘
遇水大之年黃河水漲即著星速報知總河預為修防
始得保全也

康熙四十九年庚寅十二月庚辰河道總督趙世

顯摺奏御壩西壩工程請修築加長

上諭大學士等曰御壩西壩關係緊要甲子年朕南巡時清流不暢黃水倒灌以致洪澤湖上流淤墊朕指修御壩西壩清水遂暢然流出黃水不致倒灌淮黃交會之區始得安瀾但其地甚卑濕彼時朕步行閱視十餘里泥濘沒膝指授方畧總之治水如治天下得其道則治不可用巧妄行靳輔善於治河惟用人力于成龍心計太過張鵬翮但遵舊守成法而已張鵬翮係漢人豈能

乘騎在在馳驅料理惟於朕諭遵行不違是以河工底績耳今御壩西壩加長工程俱如所請令及時興工修築

康熙五十年辛卯二月戊辰

上諭大學士等曰河務甚難朕昔因挖子牙河親身往視有大城武清縣民跪於兩岸互相爭訴朕慰之曰爾等勿得爭競朕自有處置之法因一一指授監修官員而回後河工告成於兩處百姓均有裨益前張鵬翮任總

河時來陞見朕訓之曰爾於河工不可任意從事但守成規遵奉朕諭而行及修御壩之時朕親身指授釘樁張鵬翮遵朕指授修建自此壩告成清黃二水始會流入海矣黃河水性善於更移朕幸寧夏時由黃河行二十一日至湖灘河朔因邇外無修治之人故黃河處處更移視水性每向南流北岸尚可南岸多被衝決古時黃水由天津碣石而流此言載在書經禹貢後又移流在德州自後漸移於南方矣治河固宜順水性亦在隨

時調度今使諸水入大海者豈盡隨水性哉

康熙五十五年丙申十月丙申河道總督趙世顯
疏言管河官員遇有丁憂回籍者請仍畱河工効
力

上諭大學士等曰河工告成二十餘年善後之方不可不
講在工之人必年久諳練方能辦理譬如行軍務須曾
經出征者始於營伍熟諳況黃河之水遷徙不常最難
疏治如下埽築隄建挑水壩非久於其地之人不能熟

悉著照所請行但築隄亦有不同黃水難於修築而易於保固清水易於修築而難於保固此又不可不知清水暢流可以刷沙使河水深通永無倒灌之虞然欲使清水暢流必全閉六壩使盡由清口而出方能敵黃朕昔南巡乘船閱河隄內居民歷歷可見今於隄內望黃河行舟帆檣皆不可見可知近日河水之深矣

康熙五十七年戊戌三月壬子

上諭大學士等曰朕昔南巡時曾乘舟閱視沛縣在運河

之西隅地勢窪下積水甚多常因運河水淺穴隄引所積之水洩入運河今看每年沛縣之田皆以被水災具奏特以沛縣地勢窪下常被水災遂視為一定之事雖不成災亦以成災奏請蠲免錢糧耳將沛縣所積之水作何區畫與民有益之處爾等會同九卿議奏

康熙六十年辛丑四月庚子

上諭大學士九卿等曰朕於河務留心最切經歷最深往年屢次閱河時精力尚強親乘小舟不避水險各處周

覽凡水泉源委皆知之甚悉山東運河全賴衆泉蓄洩
微山諸湖以濟漕運今山東多開稻田截湖水上流之
泉以資灌溉上流既截湖水自然無所蓄潴安能濟運
水在地中如人身之有血氣血氣有餘方可用滲洩之
藥若血氣不足正需滋養安可再加滲洩乎地方官未
知水之源流一任民間截水灌田以為愛恤百姓不知
漕運實因此而悞也若不許民間偷截泉水則湖水易
足湖水既足自能濟運矣今不講究本源但見湖水日

少河身日淺徒事開濬假使河身日深泉水不繼雖費百萬帑金終歸無用且古人所置南北諸閘更將何以處之古人置閘其遠近疎密皆因地形高下水勢緩急以為蓄洩或一處二閘或一二十里一閘確有一定丈尺不可更易分水龍王廟閘座尤關緊要當時宋禮用白英老人之策築戴村壩以遏汶水導之出鵝湖口入南旺湖然後水流南北以分水口為水脊蓋山東登萊諸山之脉自關東來結為泰山是北幹分支之一在黃

河之東而黃河之西山脉自終南太一南屈淮汝為中
幹分支之一黃河行乎兩支之中故昔時河自天津入
海以後漸徙而南至淮安入海而登州以上馬谷山以
下從無黃河之迹者山脉限之也分水口之水脊又為
泰山分支之分脊處白英積數十年精思確有所見定
為此議宋禮從之因勢均導南得七分北得三分增修
水閘以時啟閉漕運遂通此等膽識後人實所不及亦
不能得水平如此之準也今此二閘最宜斟酌啟閉若

淺於南則當閉北閘使分北之水亦歸於南淺於北則當閉南閘使分南之水亦歸於北湖泉並注南北合流雖有旱暵亦無慮矣豈若徒事開濬勞費而無益乎往年山東百姓欲開新河朕恐其下流泛濫降旨弗許今巡撫請開彭口新河此地一面為微山湖一面為嶧縣諸山更從何處開鑿耶著張鵬翮到山東將朕此旨詳諭巡撫申飭地方官令其相度泉源蓄積湖水俾漕運無悞特易耳黃河關係最大自元至明歲有衝決未

有安瀾二十年如今日者然圖治於已治保安於已安
河工雖已告成尤當時加巡視不可疎忽今春多風而
少雨恐秋間雨水必多地方官宜加意隄防張鵬翮去
看山東運河由臨清起至韓莊閘韓莊閘離邳州不遠
并往視邳州低窪之水曾否洩出太行隄有坍塌之處
亦當往看有賢能司官多帶幾員去地方有用著之處
即留彼處料理

九月甲午

上諭大學士等曰黃河遷徙無常每有衝決隄岸淹沒田廬之患昔黃河會九河從天津入海後漸遷徙而南約計遷徙之地已千餘里矣漢武帝塞瓠子口嗣後代有衝決朕畱心河務屢行親閱動數千萬帑金指示河臣修築高家堰石隄及凡應修築之處奏安瀾者幾四十年於運道民生均有裨益前巡幸至湖灘河朔保德州橫城潼關孟津徐州宿遷邳州桃源清口等處俱曾渡河自橫城順黃河下流歷人所未經行之河套凡舟行

二十二日直達數千里所至之處無不詳視惟孟津渡河時因淤沙不能直渡委折而行彼時朕即慮沙淤則流滯隄岸必致衝決今據報黃河衝決流入沁河泛溢至直隸長垣縣等處若今冬將決口堵築堅固可保無虞否則自決處以下勢分沙壅河水陡長隄岸之危非一所矣昨趙宏燮奏河決之處或在瓠子口以上或在瓠子口之下并河道情形著詳問九卿及在京河南省官員具奏

壬寅

上諭大學士九卿等曰直隸總督趙宏燮奏河南黃沁衝
決隄岸水勢泛溢至長垣等處朕即遣官查視所決地
方據奏河南武陟縣黃沁之水衝決隄岸由長垣流入
山東張秋鎮又據山東巡撫李樹德奏河水泛溢自直
隸開州流入山東張秋鎮由鹽河入海以致運河隄決
漕船阻滯其衝決隄岸見在修築朕思此衝決之處只
可畧加修防使漕船無阻如竟行堵塞水無歸洩之地

他處又必衝決斷乎不可開州係古黃河故道今黃沁
泛溢由開州至山東地方已成河道矣將來堵塞完工
不使沁水入黃直引至山東或有裨益亦未可定朕留
心河務各處黃河渡口俱曾親歷適遣往看河之官所
呈圖樣及李樹德所進河圖朕俱詳覽知之最明爾等
繕寫諭旨發往張鵬翮處伊所審事畢著即會同總漕
施世綸至張秋鎮等處詳行查勘料理使漕船往返不
致遲悞如張鵬翮已回即於接旨之處作速前往至修

築決河甚屬緊要朕自京中另遣專官著總河趙世顯將熟練河務官員工役派出并將修築物料多行備辦速發往河南衝決地方

丙午

上諭大學士等曰朕因黃沁二水泛濫漫及長垣等縣曾諭爾等以堵塞之後不使沁水入黃引入山東漕河於運道民生大有裨益爾等可將此河圖發與九卿共閱即著定議具奏將來引沁入運之後遇水大時流至天

津恐河身不能容納必令於鹽河洩其水勢方可無虞
直隸山東河南被水之民應行賑濟著該督撫各行查
奏

丙辰

上諭大學士等曰堵築黃河漫溢工程此第一緊要之事
著副都御史牛鈕侍講齊蘇勒員外郎馬泰前往監修
其堵築時宜先於上流建挑水壩以殺水勢俟沙淤後
再漸次加築則漫溢之勢自平而堵塞不甚費力矣朕

於清口建築挑水壩時曾經指示此事齊蘇勒馬泰等
悉知之至於前項工程毋得吝惜錢糧河南地方河底
不凍今冬宜作速興築其建挑水壩之時應挑引河黃
河有曲折之處即成洲渚務詳勘酌量取直挑成引河
俟黃河決口堵塞報竣之後再引沁河濟運分水龍王
廟之中八閘北八閘春時水淺船行有阻應將沁河之
水於此處引入運河如不能容納由鹽河瀉其水勢自
於運道大有裨益分水龍王廟南八閘水多不需水濟

朕另有旨與張鵬翮令學士格爾布前往宣諭再徐州
下流黃河可以無虞獨徐州上流黃河多有沙淤不可
不預防衝決將此旨宣諭該管各官宜先防備

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三十四